

黔

語

黔

語

黔語序

滇黔世竝稱顧黔入中國爲最後無明以前名勝遺跡及金石文字滇事多紀載之書黔則尠有述者又郡邑率闕志乘此與滇異也余於滇黔皆再至而居黔日尤久蕞爾荒陋每俯仰今古輒歎山川之寥寥暇日嘗錄所聞見或兩說相迂而無書可以徵信則姑置之間有意中欲書爲事所奪寢久而遺忘者亦十之二三焉瑣屑枝蔓無有條理隨手放散零亂篋中復六七年矣甲寅長夏退食無事偶爾檢閱其中亦有可資考證者因次第之析爲二卷以所語之囿於黔也命之曰黔語咸豐四年七月驪翁吳振棫

武侯藏甲人爭詫太白聞鶯事亦奇

黔事之不足據者類如此

休怪齊東

多野語古來青史有傳疑

一編誰續山蘊筆頭禿張顛苦用心笑我椎儲拚覆瓿嬾從

奇字學艱深

介侯續黔書
好摹籀古文

臞翁又題

黔語目錄

卷上

改土歸流

疆域割隸

牂牁江

開通都江之利

開通清江之利

盤江
盤江橋庚戌
西林渡附

黃平河

戴家溝紀略

鎮遠三尾

九千里

牛皮箐

紅崖字

近郭諸山之勝

新舊聖泉

飛雲巖

陽明洞

三元牟珠大峰諸洞

雪厓洞

水口寺

二忠事略

王節愍

祖孫撫黔

蘇大刀

南籠苗變

謝穆之亂

卷下

改驛

鑄錢

鉛

黔不增賦

塘堰

榘繭之始

三書院紀略

尙節及幼兩堂紀略

十八先生墓

飛山廟之誤

南康二祀之誤

建文遺跡

張三丰

斷碑硯

夢草池

馬寶袍劍

鐵柱

諸葛臺

昭忠祠撤位

電神祠

虎頭致雨

馬著草鞵

打鬧

送瓜

壇神

墓祭

衙祭

字豕

田不論畝

錢不論貫陌

黎平木

白蠟樹

雞縱

土物

酒

白椒土

伸筋草

蜂洞

平簫

白石

石燕

粉養

王卡苗

花麻布蛭

奪親

坐家

蓄醅

鬼竿換帶

外甥錢

啞酒

西

小

東

南

北

東

黔語卷上

錢塘吳振棫臞翁纂

改土歸流

黔古荒服地元以前羈縻州耳至元明乃隸版圖永樂後始設督撫布按諸官視他省我朝順治康熙間平馬乃平水西增置郡縣疆土於是日闢然頑苗梗化土司逞虐鈔暴遠近文武莫敢誰何雍正初提督馬會伯總兵石禮哈嘗以苗事入告

憲廟難之旣而總督鄂文端詳審事勢謂非改土歸流則黔滇楚粵之禍無已時也始以長寨苗不法以兵治之長寨平苗頗懾於是化誨招撫收其版籍薄其租賦歡然求內附者不下數千寨其兇悍者則草薶禽獮之當時之議以爲欲靖苗疆自八

寨始而八萬裏古州者元時所置古州八萬洞軍民長官司地也地直抵粵西與黎平都勻鎮遠三府壤相錯都江丹江清水江貫其中廣袤一千二三百里生苗踞之戶殆十餘萬故必古州定而後可以通黔粵而鎮遠之上下九股生苗亦可以次鋤翦運籌決策臣主一心於是

憲廟涓吉日合年命於養心殿鑄三省總督印以畀文端文端稟

宸謨採羣策經營布置重以兵力然後一一戡定六年平八寨設同知七年設丹江通判清江同知古州同知九年設都江通判十一年以清江同知移駐台拱改設清江通判建營分汛以貴東道駐古州統轄之冠蓋往來商賈輻湊挈化外入

皇輿化榛狉知文教

黎平今設苗學

百餘年來咸受福利實文端之偉

烈也垂名圖牒侑饗大烝宜哉

疆域割據

黔地初極徧小雍正五年鄂文端以粵之泗城府延袤二千餘里北與黔接請改土歸流以紅水江爲限制割江以北地長壩尋郎羅斛等十六里及西隆州之羅煩冊亨等四甲半零二十一寨歸黔建永豐州於長壩

乾隆四十年移羅斛隸定番州嘉慶二年改永豐爲貞豐

復闢古

州地千餘里而舊隸四川之遵義一府及所屬五州縣改歸黔轄而黔居然一大都會矣

牂牁江

牂牁江今都江也源出都勻府境至獨山逕都江廳入古州匯榕江車江西折而南過下江廳界至丙妹入廣西境爲龍江亦名柳江經懷遠雒容諸縣界至廣東南海縣入海漢書稱牂牁

江廣數里出番禺城下唐蒙上書謂夜郎精兵可得十萬浮船
牂柯江出不意制粵水經注脉水東北流逕談稟縣東逕牂柯
郡且蘭謂之牂柯水今黔中諸水入粵者三盤濛二水舟楫不
能通惟都江自獨山之三腳望浮舟直達粵東水漲可兩旬至
與唐蒙發精兵下牂柯及會番禺之說合黔記以爲在定番黔
書以入楚之烏江當之明鄭文又以盤江爲牂柯江今水經云
烏江志名牂柯江以水出牂柯郡也蓋泥於且蘭故地爲今之
遵義湄潭故仍以牂柯屬之烏江不知年代遼遠蠻地阻絕當
時所稱夜郎牂柯且蘭其地甚大非可執今之一郡一縣以當
之也惟水之所歸雖數千載莫能改而舟楫之可達與否又事
之可顯證者故舍都江無可會番禺之水則都江之爲牂柯信
矣又楊升庵譚苑醍醐云牂柯一作牂歌其字從弋杙繫船木

也說文漢書注舊解如此牂牁今貴州地其江水迅疾難渡立兩杙於兩岸中以繩組之舟人循繩而渡盤江崇安江皆然因悟古人制字之義云云按今循繩而渡者凡水極駛處皆然不能專屬之一水也升庵特緣字義而傳會之未足爲據

開通都江之利

雍正間鄂文端以都江三水自都勻達粵之柳慶沿江洞苗多未附道第不治調粵兵平之乃檄文武勘視上自獨山州之三腳壘至三洞下自古州諸葛洞至溶洞疏淺灘伐惡木鏟恠石唐蒙古道閉塞累代一旦開闢遂成康衢陸行可輿水行可舟兩省文符迅疾如駛於是粵鹽得行於黔設總埠於古州而分子埠於黎平諸郡縣閭閻無食淡之患商賈日衆南海百貨亦捆載而至古州遂爲一都會云